

四庫全書

史部

欽定四庫全書

史部

史記集解卷八十五

十二

詳校官侍讀學士

臣陸伯焜

洗馬

臣

王坦修覆勘

總校官檢討

臣何思鈞

校對官待詔

臣胡士震

謄錄監生

臣黃其榮

欽定四庫全書

史記集解卷八

宋 裴駰 撰

史記八

高祖本紀第八

高祖

漢書音義曰薛邦張晏曰禮謚法無高以功收高而為漢帝之太祖故特起名焉

沛豐邑

中陽里人姓劉氏

李斐曰沛小沛也劉氏隨魏徙大梁移在豐居中陽里孟康曰後沛為郡

豐為縣

字季父曰太公母曰劉媪

文穎曰幽州及漢中皆謂老嫗為媪孟康曰長

老尊稱也左師謂太后曰媼愛燕后賢長安其先劉媪

嘗息大澤之陂夢與神遇是時雷電晦冥太公往視則

見蛟龍於其上已而有身遂產高祖高祖為人隆準而

龍顏

服虔曰準音拙應劭曰隆高也準頰權準也顏頰類也齊人謂之頰汝南非泗之間曰顏大顏曰準

也美須髯左股有七十二黑子仁而愛人喜施意豁如

也服虔曰豁達也常有天度不事家人生產作業及壯試為吏

試應劭曰補吏為泗水亭長廷中吏無所不狎侮好酒及色常

從王媼武負貫酒韋昭曰貫賂也醉臥武負王媼見其上常有

龍怪之高祖每酤留飲酒讎數倍

如淳曰讎亦售

及見怪歲竟

此兩家常折券棄責高祖常繇咸陽

應劭曰繇役也

縱觀觀秦

皇帝喟然太息曰嗟乎大丈夫當如此也單父人呂公

漢書音義曰單

音善父音斧

善沛令避仇從之客因家沛焉沛中豪

桀吏聞令有重客皆往賀蕭何為主吏

孟康曰主吏功曹也

主進

文穎曰主賦敘禮進為之帥

令諸大夫曰進不滿千錢坐之堂下高

祖為亭長素易諸吏乃紹為謁曰

應劭曰紹歟也音殆

賀錢萬實

不持一錢謁入呂公大驚起迎之門呂公者好相人見

高祖狀貌因重敬之引入坐蕭何曰劉季固多大言少

成事高祖因狎侮諸客遂坐上坐無所詘酒闌

文穎曰闌言希

也謂飲酒者半罷半在謂之闌

呂公因目固留高祖高祖竟酒後呂公

曰臣少好相人

張晏曰古人相與語多自稱臣自卑下之道若今人相與語皆自稱僕

相

人多矣無如季相願季自愛臣有息女願為季箕帚妾

酒罷呂媼怒呂公曰公始常欲奇此女與貴人沛令善

公求之不與何自妄許與劉季呂公曰此非兒女子所

知也卒與劉季呂公女乃呂后也生孝惠魯元公主

服虔

曰元長也食邑於高祖為亭長時常告歸之田

服虔曰告音如

皞呼之皞李斐曰休謁之名也吉曰告凶曰寧孟康曰古者名吏休假曰告告又音譬漢律吏二千石有予告賜告者予告在官有功最法所當得者也賜告者病滿三月當免天子優賜復其告使得帶印綬將官屬歸家

治病也

呂后與兩子居田中耨有一老父過請飲呂后因

舖之老父相呂后曰夫人天下貴人令相兩子見孝惠

曰夫人所以貴者乃此男也相魯元亦皆貴老父已去

高祖適從旁舍來呂后具言客有過相我子母皆大貴

高祖問曰未遠乃追及問老父老父曰鄉者夫人嬰兒

皆似君君相貴不可言高祖乃謝曰誠如父言不敢忘

德及高祖貴遂不知老父處高祖為亭長乃以竹皮為

冠令求盜之薛治之

應劭曰以竹始生皮作冠今鵲尾冠是也求盜者舊時序有兩卒其

一為亭父掌開閉掃除一為求盜掌逐捕時時冠之及

盜賊薛魯國縣也有作冠師故往治之

貴常冠所謂劉氏冠乃是也高祖以亭長為縣送徒酈

山徒多道亡自度比至皆亡之到豐西澤中止飲夜乃

解縱所送徒曰公等皆去吾亦從此逝矣徒中壯士願

從者十餘人高祖被酒夜徑澤中令一人行前行前者

還報曰前有大蛇當徑願還高祖醉曰壯士行何畏乃

前拔劍擊斬蛇蛇遂分為兩徑開行數里醉因臥後人

來至蛇所有一老嫗夜哭人問何哭嫗曰人殺吾子故

哭之人曰嫗子何為見殺嫗曰吾子白帝子也化為蛇

當道今為赤帝子斬之

應劭曰秦襄公自以居西戎主少昊之神作西時祠白帝至獻

公時橡陽雨金以為瑞又作畦時祠白帝少昊金德也赤帝堯後謂漢也殺之者明漢當滅秦也秦自謂水漢

初自謂土皆失之至光武乃改定

故哭人乃以嫗為不誠欲笞之

徐廣曰一

作嫗因忽不見後人至高祖覺後人告高祖高祖乃心

獨喜自負

應劭曰負恃也

諸從者日益畏之秦始皇帝常曰東

南有天子氣於是因東游以厭之高祖即自疑亡匿隱

於芒碭山澤巖石之間

徐廣曰芒今臨淮縣也碭縣在梁駟案應劭曰二縣之界有山

澤之固故隱於其間

呂后與人俱求常得之高祖怪問之呂后曰

季所居上常有雲氣故從徃常得季高祖心喜沛中子

弟或聞之多欲附者矣秦二世元年

徐廣曰高祖時年四十八

秋陳

勝等起斬至陳而王號為張楚諸郡縣皆多殺其長吏

以應陳涉沛令恐欲以沛應涉掾主吏蕭何曹參乃曰

君為秦吏今欲背之率沛子弟恐不聽願君召諸亡在外者可得數百人因劫眾眾不敢不聽乃令樊噲召劉季劉季之眾已數十百人矣於是樊噲從劉季來沛令後悔恐其有變乃閉城城守欲誅蕭曹蕭曹恐踰城保

劉季

韋昭曰以
為保障

劉季乃書帛射城上謂沛父老曰天下

苦秦久矣今父老雖為沛令守諸侯竝起今屠沛沛令共誅令擇子弟可立者立之以應諸侯則家室完不然父子俱屠無為也父老乃率子弟共殺沛令開城門迎

劉季欲以為沛令劉季曰天下方擾諸侯並起今置將不善壹敗塗地吾非敢自愛恐能薄不能完父兄弟此大事願更相推擇可者蕭曹等皆文吏自愛恐事不就後秦種族其家盡讓劉季諸父老皆曰平生所聞劉季諸珍怪當貴且卜筮之莫如劉季最吉於是劉季數

讓衆莫敢為乃立季為沛公

徐廣曰九月也駟案漢書音義曰舊楚僭稱王其縣

宰為公陳涉為楚王沛公起應涉故從楚制稱曰公祠黃帝祭蚩尤於沛庭

應劭曰左

傳曰黃帝戰於阪泉以定天下蚩尤好五兵故祠祭之求福祥也瓚曰管仲云葛盧山交而出水金從之出蚩

尤受之以
作劍戰

而釁鼓

應劭曰釁祭也殺牲以血塗鼓曰釁
瓚曰案禮記及大戴禮有釁廟之禮

皆無
祭事

旗幟皆赤由所殺蛇白帝子殺者赤帝子故上赤

於是少年豪吏如蕭曹樊噲等皆為收沛子弟二三千

人攻胡陵方與

鄭德曰音房
豫屬山陽郡

還守豐秦二世二年陳涉

之將周章軍西至戲而還燕趙齊魏皆自立為王項氏

起吳秦泗川監平

文穎曰泗川今沛郡也高祖更名沛
秦時御史監郡若今刺史平名也

將兵圍豐二日出與戰破之命雍齒守豐引兵之薛泗

川守壯

如淳曰
壯名也

敗於薛走至戚

如淳曰戚
音將毒反

沛公左司馬

得泗川守壯殺之沛公還軍亢父

鄭德曰亢音人相亢
荅父音甫屬任城郡

至方與周市來攻方與未戰陳王使魏人周市略地周

市使人謂雍齒曰豐故梁徙也

文穎曰梁惠王孫假為
秦所滅轉東徙於豐故

曰豐梁徙今魏地已定者數十城齒今下魏魏以齒為侯守

豐不下且屠豐雍齒雅不欲屬沛公

服虔曰雅故也
蘇林曰雅素也及

魏招之即反為魏守豐沛公引兵攻豐不能取沛公病

還之沛沛公怨雍齒與豐子弟叛之聞東陽寧君秦嘉

文穎曰秦嘉東陽郡人也為寧縣君瓚曰陳勝傳曰廣
陵人秦嘉然則東陽人也秦嘉初起兵於郟號曰大司

馬又不為寧縣君東陽寧君自一人秦嘉又自一人立景駒為假王在留乃往從

之欲請兵以攻豐是時秦將章邯從陳別將司馬尼

如淳

曰從陳涉將也涉在陳其將相別在他許皆稱陳尼章邯司馬將兵北定楚地屠相至

碭東陽寧君沛公引兵西與戰蕭西不利還收兵聚留

引兵攻碭三日乃取碭因收碭兵得五六千人攻下邑

拔之還軍豐聞項梁在薛從騎百餘往見之

徐廣曰三月

項

梁益沛公卒五千人五大夫將十人

蘇林曰五大夫第九爵也以五大夫

為將凡十人也沛公還引兵攻豐

徐廣曰表云拔之雍齒奔魏

從項梁月餘

項羽已拔襄城還項梁盡召別將居薛聞陳王定死因

立楚後懷王孫心為楚王治盱台項梁號武信君居數

月北攻亢父救東阿破秦軍齊軍歸楚獨追北

服虔曰師敗曰

北使沛公項羽別攻城陽屠之軍濮陽之東與秦軍戰

破之秦軍復振

李奇曰振整也如淳曰振起也收敗卒自振迅而復起也

守濮陽環

水

文穎曰決水以自環守為固也張晏曰依河水以自環繞作壘

楚軍去而攻定陶定

陶未下沛公與項羽西略地至雍丘之下與秦軍戰大

破之斬李由還攻外黃外黃未下項梁再破秦軍有驕

色宋義諫不聽秦益章邯兵夜銜枚擊項梁

周禮有銜枚氏鄭玄

曰銜枚止言語譁譁也銜狀如著橫銜之繮結於項者繮音獲

大破之定陶項梁死沛

公與項羽方攻陳留聞項梁死引兵與呂將軍俱東呂

臣軍彭城東項羽軍彭城西沛公軍碭章邯已破項梁

軍則以為楚地兵不足憂乃渡河北擊趙大破之當是

之時趙歇為王秦將王離圍之鉅鹿城此所謂河北之

軍也秦二世三年楚懷王見項梁軍破恐徙盱台都彭

城并呂臣項羽軍自將之以沛公為碭郡長封為武安

侯將碭郡兵封項羽為長安侯號為魯公呂臣為司徒
其父呂青為令尹趙數請救懷王乃以宋義為上將軍
項羽為次將范增為末將北救趙令沛公西略地入關
與諸將約先入定關中者王之當是時秦兵彊常乘勝
逐北諸將莫利先入關獨項羽怨秦破項梁軍奮願與
沛公西入關懷王諸老將皆曰項羽為人僇悍猾賊項
羽嘗攻襄城襄城無遺類

徐廣曰遺一作噍噍食也音在妙反駟案如淳曰類無復

有活而噍食者也青州俗言無牙遺為無噍類

皆阬之諸所過無不殘滅且楚

數進取

如淳曰楚謂陳涉也數進取多所攻取

前陳王

漢書音義曰陳涉也

項梁皆

敗不如更遣長者扶義而西告諭秦父兄秦父兄苦其

主久矣今誠得長者往毋侵暴宜可下今項羽僥倖今

徐廣曰無此字

不可遣獨沛公素寬大長者可遣卒不許項羽

而遣沛公西略地收陳王項梁散卒乃道碭

漢書音義曰道由碭

也至成陽與杠里

漢書音義曰二縣名

秦軍夾壁破魏二軍楚軍

出兵擊王離大破之

徐廣曰表云三年十月攻破東郡尉及王離軍於成武南

沛公

引兵西遇彭越昌邑因與俱攻秦軍戰不利還至栗遇

剛武侯

應劭曰楚懷王將也漢書音義曰功臣表云棘蒲剛侯陳武武一姓柴剛武侯宜為剛侯武魏

將也瓚曰功臣表柴武以將軍起薛別救東阿至霸上入漢中非懷王將也又非魏將也例未稱謚奪其

軍可四千餘人并之與魏將皇欣魏申徒武蒲之軍并

攻昌邑昌邑未拔西過高陽

文潁曰聚邑名也屬陳留圍縣瓚曰陳留傳曰在雍

丘西南

酈食其

鄭德曰音歷異基

謂監門曰諸將過此者多吾視

沛公大人長者乃求見說沛公沛公方踞牀使兩女子

洗足酈生不拜長揖曰足下必欲誅無道秦不宜踞見

長者於是沛公起攝衣謝之延上坐食具說沛公襲陳

留漢書音義曰春秋傳曰輕行無鐘鼓曰襲得秦積粟乃以酈食其為廣野

君酈商為將將陳留兵與偕攻開封開封未拔西與秦

將楊熊戰白馬又戰曲遇東大破之楊熊走之滎陽二

世使使者斬以徇徐廣曰四月南攻潁陽屠之因張良遂略

韓地轅轅文潁曰河南新鄭南至潁川南北皆韓地也以良累世相韓故因之瓚曰轅轅險道名在

緱氏東南當是時趙別將司馬卬方欲渡河入關沛公乃北

攻平陰地理志河南有平陰縣今河陰是也絕河津南戰雒陽東軍不利

還至陽城收軍中馬騎與南陽守龔戰隼東地理志南陽有隼縣

破之略南陽郡南陽守齎走保城守宛沛公引兵過而西張良諫曰沛公雖欲急入關秦兵尚衆距險今不下宛宛從後擊彊秦在前此危道也於是沛公乃夜引兵從他道還更旗幟黎明圍宛城三匝南陽守欲自剄其舍人陳恢曰死未晚也乃踰城見沛公曰臣聞足下約先入咸陽者王之今足下留守宛宛大郡之都也連城數十人民衆積蓄多吏人自以為降必死故皆堅守乘城今足下盡日止攻士死傷者必多引兵去宛宛必隨

足下後足下前則失咸陽之約後又有彊宛之患為足下計莫若約降封其守因使止守引其甲卒與之西諸城未下者聞聲爭開門而待足下通行無所累沛公曰善

徐廣曰七月也

乃以宛守為殷侯封陳恢千戶引兵西無不下

者至丹水高武侯鯁

蘇林曰鯁音魚鯁之鯁晉灼曰功臣表戚鯁也

襄侯王陵

降西陵

韋昭曰漢封王陵為安國侯初起兵時在南陽南陽有穰縣疑襄當為穰而無禾字省耳今邵

公或作召字此類多矣瓚曰時韓成封穰侯江夏有襄是所封

還攻胡陽陵一云遇番君

別將梅銅與皆降析酈

如淳曰持益反遣魏人寧昌使秦使者

未來是時章邯已以軍降項羽於趙矣初項羽與宋義
北救趙及項羽殺宋義代為上將軍諸將黥布皆屬破
秦將王離軍降章邯諸侯皆附又趙高已殺二世使人
來欲約分王關中沛公以為詐乃用張良計使酈生陸
賈往說秦將啗以利因襲攻武關破之又與秦軍戰於
藍田南益張疑兵旗幟諸所過毋得掠鹵應劭曰鹵與虜同秦
人憚秦軍解因大破之又戰其北大破之乘勝遂破之

漢元年十月

如淳曰張蒼傳云以高祖十月至霸上故因秦以十月為歲首

沛公兵

遂先諸侯至霸上秦王子嬰素車白馬係頸以組封皇
帝璽符節降軹道旁諸將或言誅秦王沛公曰始懷王
遣我固以能寬容且人已服降又殺之不祥乃以秦王
屬吏遂西入咸陽欲止宮休舍樊噲張良諫乃封秦重
寶財物府庫還軍霸上召諸縣父老豪傑曰父老苦秦
苛法久矣誹謗者族偶語者棄市

應劭曰秦禁民聚語
偶對也瓚曰始皇本

紀曰偶語經
書者棄市

吾與諸侯約先入關者王之吾當王闕中

與父老約法三章耳殺人者死傷人及盜抵罪

應劭曰
抵至也

入當也除秦酷政但至於罪也李斐曰傷人有曲直盜賊有多少罪名不可預定故凡言抵罪未知抵何罪也

張晏曰秦法一人犯罪舉家及鄰伍坐之今但當其身坐合於康誥父子兄弟罪不相及也餘悉除

去秦法諸吏人皆案堵如故

應劭曰案次第堵牆堵也

凡吾所以來

為父老除害非有所侵暴無恐且吾所以還軍霸上待

諸侯至而定約束耳乃使人與秦吏行縣鄉邑告諭之

秦人大喜爭持牛羊酒食獻饗軍士沛公又讓不受曰

倉粟多非乏不欲費人人又益喜惟恐沛公不為秦王

或說沛公曰秦富十倍天下地形強今聞章邯降項羽

項羽乃號為雍王王關中今則來沛公恐不得有此可
急使兵守函谷關無內諸侯軍稍徵關中兵以自益距
之沛公然其計從之十一月中項羽果率諸侯兵西欲
入關關門閉聞沛公已定關中大怒使黥布等攻破函
谷關十二月中遂至戲沛公左司馬曹無傷聞項王怒
欲攻沛公使人言項羽曰沛公欲王關中令子嬰為相
珍寶盡有之欲以求封亞父勸項羽擊沛公方饗士旦
日合戰是時項羽兵四十萬號百萬沛公兵十萬號二

十萬力不敵會項伯欲活張良夜見良因以文諭項羽
項羽乃止沛公從百餘騎驅之鴻門見謝項羽項羽曰
此沛公左司馬曹無傷言之不然籍何以至此沛公以
樊噲張良故得解歸歸立誅曹無傷項羽遂西屠燒咸
陽秦宮室所過無不殘破秦人大失望然恐不敢不服
耳項羽使人還報懷王懷王曰如約項羽怨懷王不肯
令與沛公俱西入關而北救趙後天下約乃曰懷王者
吾家項梁所立耳非有功伐何以得主約本定天下諸

將及籍也乃佯尊懷王為義帝實不用其命正月項羽自立為西楚霸王王梁楚地九郡都彭城負約更立沛公為漢王王巴蜀漢中

徐廣曰三十二縣

都南鄭三分關中立

秦三將章邯為雍王都廢丘司馬欣為塞王都櫟陽董翳為翟王都高奴楚將瑕丘申陽為河南王都洛陽趙將司馬卬為殷王都朝歌趙王歇徙王代趙相張耳為常山王都襄國當陽君黥布為九江王都六懷王柱國共敖為臨江王都江陵番君吳芮為衡山王都邾燕將

臧荼為燕王都薊故燕王韓廣徙王遼東廣不聽臧荼
攻殺之無終封成安君陳餘河間三縣居南皮封梅鋗
十萬戶四月兵罷戲下諸侯各就國漢王之國項王使
卒三萬人從楚與諸侯之募從者數萬人從杜南入蝕
中

李奇曰蝕音力在杜南如淳曰蝕入漢中道川谷名

去輒燒絕棧道以備諸侯

盜兵襲之亦示項羽無東意至南鄭諸將及士卒多道
亡歸士卒皆歌思東歸韓信說漢王曰

徐廣曰韓王信非淮陰侯信也

項羽王諸將之有功者而王獨居南鄭是遷也

韋昭曰若有罪

見遷徙

軍吏士卒皆山東之人也日夜跂而望歸及其鋒而用之可以有大功天下已定人皆自寧不可復用不如決策東鄉爭權天下項羽出關使人徙義帝曰古之帝者地方千里必居上游乃使使徙義帝長沙郴縣趣義帝行羣臣稍倍叛之乃陰令衡山王臨江王擊之殺義帝江南項羽怨田榮立齊將田都為齊王田榮怒因自立為齊王殺田都而反楚予彭越將軍印令反梁地楚令蕭公角擊彭越彭越大破之陳餘怨項羽之弗王

已也令夏說說田榮請兵擊張耳齊予陳餘兵擊破常
山王張耳張耳亡歸漢迎趙王歇於代復立為趙王趙
王因立陳餘為代王項羽大怒北擊齊八月漢王用韓

信之計從故道

地理志武都有故道縣

還襲雍王章邯邯迎擊漢

陳倉雍兵敗還走止戰好時

孟康曰時音止神靈之所在也縣名屬右扶風

又

復敗走廢丘漢王遂定雍地東至咸陽引兵圍雍王廢

丘而遣諸將略定隴西北地上郡令將軍薛歐

音惡后反王

吸出武關因王陵兵南陽

如淳曰王陵亦聚黨數千人居南陽以迎太公

呂后於沛楚聞之發兵距之陽夏不得前令故吳令鄭昌為韓王距漢兵二年漢王東略地塞王欣翟王翳河

南王申陽皆降韓王昌不聽使韓信擊破之於是置隴

西北地上郡渭南

徐廣曰後曰京兆

河上

徐廣曰馮翊

中地郡

徐廣曰扶

風關外置河南郡

徐廣曰十月漢王至陝

更立韓太尉信為韓王

諸將以萬人若以一郡降者封萬戶繕治河上塞

晉灼曰鼂

錯傳秦時北攻胡築河上塞

諸故秦苑囿園池皆令人得田之正月

虜雍王弟章平大赦罪人漢王之出關至陝撫關外父

老還張耳來見漢王厚遇之二月令除秦社稷更立漢社稷三月從臨晉渡魏王豹將兵從下河內虜殷王置河內郡南渡平陰津至雒陽新城三老董公遮說漢王以義帝死故漢王聞之袒而大哭

如淳曰袒亦如禮袒踊

遂為義

帝發喪臨三日發使者告諸侯曰天下共立義帝北面事之今項羽放殺義帝於江南大逆無道寡人親為發喪諸侯皆縞素悉發關內兵收三河士

韋昭曰河南河東河內南

浮江漢以下願從諸侯王擊楚之殺義帝者是時項王

北擊齊田榮與戰城陽田榮敗走平原平原民殺之齊
皆降楚楚因焚燒其城郭係虜其子女齊人叛之田榮
弟橫立榮子廣為齊王齊王反楚城陽項羽雖聞漢東
既已連齊兵欲遂破之而擊漢漢王以故得劫五諸侯
遂入彭城項羽聞之乃引兵去齊從魯出故胡陵至蕭
與漢大戰彭城靈壁東睢水上大破漢軍多殺士卒睢
水為之不流乃取漢王父母妻子於沛置之軍中以為
質當是時諸侯見楚彊漢敗還皆去漢復為楚塞王欣

亡入楚呂后兄周呂侯為漢將兵居下邑

徐廣曰在梁

漢王

從之稍收士卒軍碭漢王乃西過梁地至虞

徐廣曰在梁

使

謁者隨何之九江王布所曰公能令布舉兵叛楚項羽必留擊之得留數月吾取天下必矣隨何往說九江王

布布果背楚楚使龍且往擊之漢王之敗彭城而西行

使人求家室家室亦亡不相得敗後乃獨得孝惠六月

立為太子大赦罪人令太子守櫟陽諸侯子在關中者

皆集櫟陽為衛引水灌廢丘廢丘降章邯自殺更名廢

丘為槐里於是令祠官祀天地四方上帝山川以時祀

之興闕內卒乘塞

李奇曰
乘守也

是時九江王布與龍且戰不

勝與隨何間行歸漢漢王稍收士卒與諸將及關中卒

益出是以兵大振滎陽破楚京索間三年魏王豹謁

歸視親疾至即絕河津反為楚漢王使酈生說豹豹不

聽漢王遣將軍韓信擊大破之虜豹遂定魏地置三郡

曰河東太原上黨漢王乃令張耳與韓信遂東下井陘

擊趙斬陳餘趙王歇其明年立張耳為趙王漢王軍滎

陽南築甬道屬之河以取敖倉與項羽相距歲餘項羽數侵奪漢甬道漢軍乏食遂圍漢王漢王請和割滎陽以西者為漢項王不聽漢王患之乃用陳平之計予陳平金四萬斤以間疏楚君臣於是項羽乃疑亞父亞父是時勸項羽遂下滎陽及其見疑乃怒辭老嫗賜骸骨歸卒伍未至彭城而死漢軍絕食乃夜出女子東門二千餘人被甲楚因四面擊之將軍紀信乃乘玉駕詐為漢王誑楚皆呼萬歲之城東觀以故漢王得與數十

騎出西門遁令御史大夫周苛魏豹縱公守滎陽諸將
卒不能從者盡在城中周苛縱公相謂曰反國之王難

與守城因殺魏豹

徐廣曰案月表三年七月王出滎陽八月殺魏豹而又云四年三月周苛

死四月魏豹死二者不同項羽殺紀信周苛縱公皆是三年中漢王之出滎陽入關收

兵欲復東袁生說漢王曰漢與楚相距滎陽數歲常困
願君王出武關項羽必引兵南走王深壁令滎陽成臯

間且得休使韓信等輯河北趙地連燕齊君王乃復走
滎陽未晚也如此則楚所備者多力分漢得休復與之

戰破楚必矣漢王從其計出軍宛葉間與黥布行收兵
項羽聞漢王在宛果引兵南漢堅壁不與戰是時彭越
渡睢水與項聲薛公戰下邳彭越大破楚軍項羽乃引
兵東擊彭越漢王亦引兵北軍成皋項羽已破走彭越
聞漢王復軍成皋乃復引兵西拔滎陽誅周苛縱公而
虜韓王信遂圍成皋漢王跳徐廣曰音逃獨與滕公共車出
成皋玉門徐廣曰項羽紀云北門名玉門北渡河馳宿修武自稱使者
晨馳入張耳韓信壁而奪之軍乃使張耳北益收兵趙

地使韓信東擊齊漢王得韓信軍則復振兵兵臨河南

饗軍小修武南

晉灼曰在大修武城東

欲復戰郎中鄭忠乃說止

漢王使高壘深塹勿與戰漢王聽其計使盧綰

蘇林曰綰音以

繩綰結物之綰

劉賈將卒二萬人騎數百渡白馬津入楚地與

彭越復擊破楚軍燕郭西遂復下梁地十餘城淮陰已

受命東未渡平原漢王使酈生往說齊王田廣廣叛楚

與漢和共擊項羽韓信用蒯通計遂襲破齊齊王烹酈

生東走高密項羽聞韓信已舉河北兵破齊趙且欲擊

楚則使龍且周蘭

徐廣曰一作簡

往擊之韓信與戰騎將灌嬰

擊大破楚軍殺龍且齊王廣犇彭越當此時彭越將兵

居梁地往來苦楚兵絕其糧食四年項羽乃謂海春

侯大司馬曹咎曰謹守成皋若漢挑戰慎勿與戰無令

得東而已我十五日必定梁地復從將軍乃行擊陳留

外黃睢陽下之漢果數挑楚軍楚軍不出使人辱之五

六日大司馬怒度兵汜水士卒半渡漢擊之大破楚軍

盡得楚國金玉貨賂大司馬咎長史欣皆自剄汜水上

項羽至睢陽聞海春侯破乃引兵還漢軍方圍鍾離昧

於滎陽東項羽至盡走險阻韓信已破齊使人言曰齊

邊楚

文穎曰
邊近也

權輕不為假王恐不能安齊漢王欲攻之

留侯曰不如因而立之使自為守乃遣張良操印綬立

韓信為齊王

徐廣曰
三月

項羽聞龍且軍破則恐使盱台人

武涉往說韓信韓信不聽漢楚久相持未決丁壯苦軍

旅老弱罷轉饟漢王項羽相與臨廣武之間而語項羽

欲與漢王獨身挑戰漢王數項羽曰始與項羽俱受命

懷王曰先入定關中者王之項羽負約王我於蜀漢罪

一項羽矯殺卿子冠軍而自尊罪二

徐廣曰卿一作慶

項羽已

救趙當還報而擅劫諸侯兵入關罪三懷王約入秦無
暴掠項羽燒秦宮室掘始皇帝冢私收其財物罪四又
彊殺秦降王子嬰罪五詐阮秦子弟新安二十萬王其
將罪六項羽皆王諸將善地而徙逐故主令臣下爭叛
逆罪七項羽出逐義帝彭城自都之奪韓王地并王梁
楚多自予罪八項羽使人陰弑義帝江南罪九夫為人

臣而弑其主殺已降為政不平主約不信天下所不容
大逆無道罪十也吾以義兵從諸侯誅殘賊使刑餘罪
人擊殺項羽何苦乃與公挑戰項羽大怒伏弩射中漢
王漢王傷胸乃捫足曰虜中吾指漢王病創臥張良彊
請漢王起行勞軍以安士卒毋令楚乘勝於漢漢王出
行軍病甚因馳入成皋病愈西入關至櫟陽存問父老
置酒梟故塞王欣頭櫟陽市留四日復如軍軍廣武關
中兵益出當此時彭越將兵居梁地往來苦楚兵絕其

糧食田橫往從之項羽數擊彭越等齊信王又進擊楚
項羽恐乃與漢王約中分天下割鴻溝而西者為漢鴻
溝而東者為楚項王歸漢王父母妻子軍中皆呼萬歲
乃歸而別去項羽解而東歸漢王欲引而西歸用留侯
陳平計乃進兵追項羽至陽夏南止軍與齊王信建成
侯彭越期會而擊楚軍至固陵不會楚擊漢軍大破之
漢王復入壁深塹而守之用張良計於是韓信彭越皆
往及劉賈入楚地圍壽春漢王敗固陵

晉灼曰
即固始

乃使使

者召大司馬周殷舉九江兵而迎之

徐廣曰周殷以兵隨劉賈

武王

行屠城父隨何劉賈齊梁諸侯皆大會垓下

徐廣曰七月

立

武王布為淮南王

五年高祖與諸侯兵共擊楚軍與

項羽決勝垓下淮陰侯將三十萬自當之孔將軍居左

費將軍居右皇帝在後絳侯柴將軍在皇帝後項羽之

卒可十萬淮陰先合不利却孔將軍費將軍縱楚兵不

利淮陰侯復乘之大敗垓下項羽卒聞漢軍之楚歌以

為漢盡得楚地項羽乃敗而走是以兵大敗使騎將灌

嬰追殺項羽東城

徐廣曰十二月

斬首八萬遂略定楚地魯為

楚堅守不下漢王引諸侯兵北示魯父老項羽頭魯乃

降遂以魯公號葬項羽穀城還至定陶馳入齊王壁奪

其軍正月諸侯及將相相與共請尊漢王為皇帝漢王

曰吾聞帝賢者也空言虛語非所守也吾不敢當帝位

羣臣皆曰大王起微細誅暴逆平定四海有功者輒裂

地而封為王侯大王不尊號皆疑不信臣等以死守之

漢王三讓不得已曰諸君必以為便便國家甲午

徐廣曰二

月甲午乃即皇帝位汜水之陽蔡邕曰上古天子稱皇其次稱帝其次稱王秦承三

王之末為漢驅除自以德兼三皇五帝故并皇帝曰義

帝無後齊王韓信習楚風俗徙為楚王都下邳立建成

侯彭越為梁王都定陶故韓王信為韓王都陽翟徙衡

山王吳芮為長沙王都臨湘番君之將梅鋗有功徙入

武關故德番君淮南王布燕王臧荼趙王敖皆如故天

下大定高祖都雒陽諸侯皆臣屬故臨江王驩

徐廣曰一作尉

為項羽叛漢令盧綰劉賈圍之不下數月而降殺之雒

陽五月兵皆罷歸家諸侯子在關中者復之十二歲其
歸者復之六歲食之一歲高祖置酒雒陽南宮高祖曰
列侯諸將無敢隱朕皆言其情吾所以有天下者何項

氏之所以失天下者何高起王陵對曰

孟康曰姓高名起
瓚曰漢帝年

紀高帝時有信平侯臣陵都武侯臣起魏相
丙吉奏事高帝時奏事有將軍臣陵臣起

陛下慢而

侮人項王仁而愛人然陛下使人攻城略地所降下者
因以予之與天下同利也項羽妬賢嫉能有功者害之
賢者疑之戰勝而不予人功得地而不予人利此所以

失天下也高祖曰公知其一未知其二夫運籌策帷帳之中決勝於千里之外吾不如子房鎮國家撫百姓給餽饌不絕糧道吾不如蕭何連百萬之軍戰必勝攻必取吾不如韓信此三者皆人傑也吾能用之此吾所以取天下也項羽有一范增而不能用此其所以為我擒也高祖欲長都雒陽齊人劉敬說及留侯勸上入都關中高祖是日駕入都關中六月大赦天下十月燕王臧荼反攻下代地高祖自將擊之得燕王臧荼即立太尉

盧綰為燕王使丞相噲將兵攻代其秋利幾反高祖自將兵擊之利幾走利幾者項氏之將項氏敗利幾為陳公不隨項羽亡降高祖高祖侯之潁川高祖至雒陽舉

通侯籍召之

如淳曰得在通侯之籍

而利幾恐故反

六年高祖

五日一朝太公如家人父子禮太公家令說太公曰天無二日土無二王今高祖雖子人主也太公雖父人臣也奈何令人主拜人臣如此則威重不行後高祖朝太公擁篲

李奇曰為恭也如今卒持帚者也

迎門却行高祖大驚下扶太

公太公曰帝人主也奈何以我亂天下法於是高祖乃

尊太公為太上皇

蔡邕曰不言帝非天子也

心善家令言賜金五百

斤十二月人有上變事告楚王信謀反上問左右左右

爭欲擊之用陳平計乃偽游雲夢

韋昭曰在南郡華容縣

會諸侯

於陳楚王信迎即因執之是日大赦天下田肯賀因說

高祖曰陛下得韓信又治秦中

如淳曰時山東人謂關中為秦中

帶河

山之險縣隔千里持戟百萬秦得百二焉

應劭曰山河之險與諸侯

利縣隔地絕千里所以能禽諸侯者得天下之利百二也李斐曰河山之險內地勢高順流而下易故天下於

秦縣隔千里持戰百萬秦得百二焉蘇林曰得百地勢中之二焉秦地險固二萬人足當諸侯百萬人也

便利其以下兵於諸侯譬猶居高屋之上建瓴水也

厚如

曰瓴盛水瓶也居高屋之上而幡瓴水蓋言其向下之勢易也建音塞晉灼曰許慎曰瓴甕似瓶者夫齊

東有琅邪即墨之饒南有太山之固西有濁河之限

灼晉

曰齊西有平原河水東北過高唐高唐即平原也孟津號黃河故曰濁河北有勃海之利地

方二千里持戟百萬縣隔千里之外齊得十二焉

曰齊應劭

得十之二故齊愍王稱東帝後復歸之卒為秦所滅者利鈍之勢異也李斐曰齊有山河之限地方二千里是為天下縣隔也設有持戟百萬之衆齊得十中之二焉百萬十分之二亦二十萬也但文相避耳故言東西秦

其勢亦敵也蘇林曰十二得十中之二二十萬
人當百萬言齊雖固不如秦二萬乃當百萬故此東

西秦也非親子弟莫可使王齊矣高祖曰善賜黃金五
百斤後十餘日封韓信為淮陰侯分其地為二國高祖

曰將軍劉賈數有功以為荊王王淮東弟交為楚王王

淮西子肥為齊王王七十餘城民能齊言者皆屬齊

漢書

音義曰此言時民流移故使齊言者還齊也乃論功與諸列侯剖符行封徙

韓王信太原七年匈奴攻韓王信馬邑信因與同謀反

太原白土

徐廣曰在上郡

曼丘臣王黃立故趙將趙利為王以

反高祖自往擊之會天寒士卒墮指者什二三遂至平
城匈奴圍我平城七日而後罷去令樊噲止定代地立
兄劉仲為代王二月高祖自平城過趙雒陽至長安長
樂宮成丞相已下徙治長安八年高祖東擊韓王信餘
反寇於東垣地理志云東垣高帝更名曰真定蕭丞相營作未央宮立
東闕北闕關中記曰東有蒼龍闕北有玄武闕玄武所謂北闕前殿武庫太倉高
祖還見宮闕壯甚怒謂蕭何曰天下匈匈苦戰數歲成敗
未可知是何治宮室過度也蕭何曰天下方未定故可

因遂就宮室且夫天子以四海為家非壯麗無以重威且
無令後世有以加也高祖乃說高祖之東垣過柏人趙
相貫高等謀弑高祖高祖心動因不留代王劉仲棄國
亡自歸雒陽廢以為合陽侯 九年趙相貫高等事發
覺夷三族廢趙王敖為宣平侯是歲徙貴族楚昭屈景
懷齊田氏關中未央宮成高祖大朝諸侯羣臣置酒未
央前殿高祖奉玉卮應劭曰鄉飲酒
禮器也受四升起為太上皇壽曰
始大人常以臣無賴晉灼曰許慎曰賴利也無利入於
家也或曰江湖之間謂小兒多詐

狡獪為
無賴

不能治產業不如仲力今某之業所就孰與仲

多殿上羣臣皆呼萬歲大笑為樂 十年十月淮南王

黥布梁王彭越燕王盧綰荆王劉賈楚王劉交齊王劉

肥長沙王吳芮皆來朝長樂宮春夏無事七月太上皇

崩櫟陽宮楚王梁王皆來送葬

漢書云
葬萬年

赦櫟陽囚更命

酈邑曰新豐八月趙相國陳豨

鄧展曰東海
人名豨曰豨

反代地上

曰豨嘗為吾使甚有信代地吾所急也故封豨為列侯

徐廣曰豨攻定臧
荼有功封陽夏侯以相國守代今乃與王黃等劫掠代

地代地吏民非有罪也其赦代吏民九月上自東往擊之至邯鄲上喜曰豨不南據邯鄲而阻漳水吾知其無能為也聞豨將皆故賈人也上曰吾知所以與之乃多以金啗豨將豨將多降者十一年高祖在邯鄲誅豨

等未畢豨將侯敞將萬餘人游行王黃軍曲逆

文穎曰今中山

蒲陰是

張春渡河擊聊城

徐廣曰在平原

漢使將軍郭蒙與齊將

擊大破之太尉周勃

漢書百官表曰太尉秦官應劭曰自上安下曰尉武官悉以為稱

道太原入

韋昭曰道猶從

定代地至馬邑馬邑不下即攻殘之

穉將趙利守東垣高祖攻之不下月餘卒罵高祖高祖

怒城降令出罵者斬之不罵者原之於是乃分趙山北

立子恒以為代王都晉陽

如淳曰文紀言都中都又文帝過太原復晉陽中都二歲

似遷都於中都也

春淮陰侯韓信謀反關中夷三族夏梁王彭

越謀反廢遷蜀復欲反遂夷三族立子恢為梁王子友

為淮陽王秋七月淮南王黥布反東并荊王劉賈地北

渡淮楚王交走入薛高祖自往擊之立子長為淮南王

十二年十月高祖已擊布軍會甄

徐廣曰在蕲縣西駟案漢書音義曰會音

儋保邑名甄
音直偽反

布走令別將追之高祖還歸過沛留置酒

沛宮悉召故人父老子弟縱酒發沛中兒得百二十人

教之歌酒酣

應劭曰不醒不醉
曰酣一曰酣洽也

高祖擊筑

韋昭曰筑古
樂有弦擊之

不自為歌詩曰大風起兮雲飛揚威加海內兮歸故鄉

安得猛士兮守四方令兒皆和習之高祖乃起舞慷慨

傷懷泣數行下謂沛父兄曰游子悲故鄉吾雖都關中

萬歲後吾魂魄猶樂思沛且朕自沛公以誅暴逆遂有

天下其以沛

風俗通義曰漢書注沛人語初發聲皆言
其其者楚言也高祖始登帝位教令言其

後以為常耳

為朕湯沐邑復其民世世無有所與沛父兄諸

母故人日樂飲極驪道舊故為笑樂十餘日高祖欲去

沛父兄固請留高祖高祖曰吾人衆多父兄不能給乃去沛

中空縣皆之邑西獻

如淳曰
獻牛酒

高祖復留止張

張晏曰
張惟張

飲

三日沛父兄皆頓首曰沛幸得復豐未復唯陛下哀憐

之高祖曰豐吾所生長極不忘耳吾特為其以雍齒故

反我為魏沛父兄固請乃并復豐比沛於是拜沛侯劉

濞

服虔曰
濞音岐

為吳王漢將別擊布軍洮水南北

徐廣曰
洮音道在江

淮間皆大破之追得斬布都陽樊噲別將兵定代斬陳豨

當城十一月高祖自布軍至長安十二月高祖曰秦始皇帝楚隱王陳涉魏安釐王齊湣王趙悼襄王皆絕無後予守冢各十家秦皇帝二十家魏公子無忌五家赦代地吏民為陳豨趙利所劫掠者皆赦之陳豨降將言豨反時燕王盧綰使人之豨所與陰謀上使辟陽侯迎綰綰稱病辟陽侯歸具言綰反有端矣二月使樊噲周勃將兵擊燕王綰赦燕吏民與反者立皇子建為燕王

高祖擊布時為流矢所中行道病病甚吕后迎良醫醫
入見高祖問醫醫曰病可治於是高祖嫚罵之曰吾以
布衣提三尺劍取天下此非天命乎命乃在天雖扁鵲
何益遂不使治病賜金五十斤罷之已而吕后問陛下
百歲後蕭相國即死令誰代之上曰曹參可問其次上
曰王陵可然陵少慙陳平可以助之陳平智有餘然難
以獨任周勃重厚少文然安劉氏者必勃也可令為太
尉吕后復問其次上曰此後亦非而所知也盧綰與數

千騎居塞下候伺幸上病愈自入謝四月甲辰高祖崩

長樂宮

皇甫謐曰高祖以秦昭王五十四年

生至漢十二年年六十三四日不發喪呂

后與審食其謀曰諸將與帝為編戶民今北面為臣此
常怏怏今乃事少主非盡族是天下不安人或聞之語

酈將軍酈將軍

漢書曰酈商

往見審食其曰吾聞帝已崩四

日不發喪欲誅諸將誠如此天下危矣陳平灌嬰將十
萬守滎陽樊噲周勃將二十萬定燕代此聞帝崩諸將
皆誅必連兵還鄉以攻關中大臣內叛諸侯外反亡可

翹足而待也審食其入言之乃以丁未發喪大赦天下

盧綰聞高帝崩遂亡入匈奴丙寅

徐廣曰七月

己巳立太子

至太上皇廟羣臣皆曰高祖起微細撥亂世反之正平

定天下為漢太祖功最高上尊號為高皇帝太子襲號

為皇帝孝惠帝也令郡國諸侯各立高祖廟以歲時祠

及孝惠五年思高祖之悲樂沛以沛宮為高祖原廟

徐廣曰光

武紀曰上幸豐祠高祖於原廟駟案謂原者再也先既已立廟今又再立故謂之原廟高祖所教

歌兒百二十人皆令為吹樂後有缺輒補之高帝八男

長庶齊悼惠王肥次孝惠呂后子次戚夫人子趙隱王如意次代王恒已立為孝文帝薄太后子次梁王恢呂太后時徙為趙共王次淮陽王友呂太后時徙為趙幽王次淮南厲王長次燕王建

太史公曰夏之政忠忠之敝小人以野

鄭玄曰忠實厚也野少禮節也

故殷人承之以敬敬之敝小人以鬼

鄭玄曰多威儀如事鬼神

故周

人承之以文文之敝小人以僂

徐廣曰一作薄駟案史記索隱曰僂音西志反

鄭玄曰文尊卑之差也薄苟習文法無惻誠也

故救僂莫若以忠

鄭玄曰復反始

三王

之道若循環終而復始周秦之間可謂文敝矣秦政不改反酷刑法豈不謬乎故漢興承敝易變使人不倦得
天統矣朝以十月車服黃屋左纁葬長陵

皇甫謐曰長陵山東西廣

百二十步高十三丈在渭水北去長安城三十五里

史記集解卷八

欽定四庫全書

史記集解卷九

宋 裴駰 撰

史記九

呂后本紀第九

呂太后者

徐廣曰呂后父呂公漢元年為臨泗侯四年卒高后元年追謚曰呂宣王高祖微

時妃也

漢書音義曰諱姬

生孝惠帝

漢書音義曰諱盈

女魯元太后及

高祖為漢王得定陶戚姬

如淳曰姬音怡衆妾之總稱也漢官曰姬妾數百蘇林曰清河

同有妃里而題門作姬璣曰漢秋祿令及茂陵書姬內官也秩比二千石位次婕妤下在七子八子之上愛

幸生趙隱王如意孝惠為人仁弱高祖以為不類我常欲廢太子立戚姬子如意如意類我戚姬幸常從上之關東日夜啼泣欲立其子代太子吕后年長常留守希見上益疏如意立為趙王後幾代太子者數矣賴大臣爭之及留侯策太子得毋廢吕后為人剛毅佐高祖定天下所誅大臣多吕后力吕后兄二人皆為將長兄周吕侯

徐廣曰名澤高祖八年卒謚令武侯追謚曰悼武王

死事封其子吕台為鄼

侯

徐廣曰廊一作廊

子產為交侯

徐廣曰台弟也

次兄呂釋之為建成

侯

徐廣曰惠帝二年卒謚康王

高祖十二年四月甲辰崩長樂宮太

子襲號為帝是時高祖八子長男肥孝惠兄也異母肥

為齊王餘皆孝惠弟戚姬子如意為趙王薄夫人子恒

為代王諸姬子恢為梁王子友為淮陽王子長為淮南

王子建為燕王高祖弟交為楚王兄子濞為吳王非劉

氏功臣番君吳芮子臣為長沙王呂后最怨戚夫人及

其子趙王廼令永巷

如淳曰列女傳曰周宣姜后脫簪珥待罪永巷後改為掖庭

囚

戚夫人而召趙王使者三反趙相建平侯周昌謂使者曰高帝屬臣趙王趙王年少竊聞太后怨戚夫人欲召趙王并誅之臣不敢遣王王且亦病不能奉詔呂太后大怒廼使人召趙相趙相徵至長安廼使人復召趙王王來未到孝惠帝慈仁知太后怒自迎趙王霸上與入宮自挾與趙王起居飲食太后欲殺之不得間孝惠元年十二月帝晨出射趙王少不能早起太后聞其獨居使人持醪飲之

應劭曰醪烏食蝨以其羽畫酒中飲之立死

犁明孝惠還

徐廣

曰犁猶比也諸言趙王已死於是廼徙淮陽王友為趙
犁明者將明之時

王夏詔賜酈侯父追謚為令武侯太后遂斷戚夫人手
足去眼煇耳飲瘖藥使居廁中命曰人羸居數日廼召
孝惠帝觀人羸孝惠見問知其戚夫人廼大哭因病
歲餘不能起使人請太后曰此非人所為臣為太后子
終不能治天下孝惠以此日飲為淫樂不聽政故有病
也二年楚元王齊悼惠王皆來朝十月孝惠與齊王燕
飲太后前孝惠以為齊王兄置上坐如家人之禮太后

怒迺令酌兩卮酖置前令齊王起為壽齊王起孝惠亦起取卮欲俱為壽太后迺恐自起泛孝惠卮齊王怪之因不敢飲詳醉去問知其酖齊王恐自以為不得脫長

安憂齊內史士

徐廣曰一作出

說王曰太后獨有孝惠與魯元

公主

如淳曰公羊傳曰天子嫁女於諸侯必使諸侯同姓者主之故謂之公主百官表列侯所食曰國皇

后公主所食曰邑諸侯王女曰公主蘇林曰公五等尊爵也春秋聽臣子以稱君父婦人稱主有主孟喻我之比故云公主瓚曰天子之女今王有七十餘城而公主

雖食湯沐之邑不居其民

迺食數城王誠以一郡上太后為公主湯沐邑太后必

喜王必無憂於是齊王廼上城陽之郡尊公主為王太

后

如淳曰張敖子偃為魯王故公主得為太后

吕后喜許之廼置酒齊邸樂

飲罷歸齊王三年方築長安城四年就半五年六年城

就諸侯來會十月朝賀七年秋八月戊寅孝惠帝崩

皇甫

謚曰帝以秦始皇三十七年生崩時年二十二

發喪太后哭泣不下留侯子張

辟彊為侍中

應劭曰入侍天子故曰侍中

年十五謂丞相曰太后獨

有孝惠今崩哭不悲君知其解乎丞相曰何解辟彊曰

帝母壯子太后畏君等君今請拜吕台吕產吕祿為將

將兵居南北軍及諸呂皆入居宮中用事如此則太后心安君等幸得脫禍矣丞相迺如辟彊計太后說其哭

迺哀呂氏權由此起迺大赦天下九月辛丑葬

漢書云葬安陵

皇覽曰山高三十二丈廣袤百二十步居地六十畝皇甫謐曰去長陵十里去長安北三十五里

太子

即位為帝謁高廟元年號令一出太后太后稱制議欲立諸呂為王問右丞相王陵王陵曰高帝刑白馬盟曰非劉氏而王天下共擊之今王呂氏非約也太后不說問左丞相陳平絳侯周勃等對曰高帝定天下王子

弟今太后稱制王昆弟諸呂無所不可太后喜罷朝王陵讓陳平絳侯曰始與高帝喋血盟諸君不在邪今高帝崩太后女主欲王呂氏諸君縱欲阿意背約何面目見高帝地下陳平絳侯曰於今面折廷爭臣不如君夫全社稷定劉氏之後君亦不如臣王陵無以應之十一月太后欲廢王陵乃拜為帝太傅

應劭曰古官傅者覆也
瓚曰大戴禮曰傅之德

義奪之相權王陵遂病免歸廼以左丞相平為右丞相以辟陽侯審食其為左丞相左丞相不治事令監宮

中如郎中令食其故得幸太后常用事公卿皆因而決

事迺追尊酈侯父為悼武王欲以王諸呂為漸四月太

后欲侯諸呂迺先封高祖之功臣郎中令無擇

徐廣曰姓馮

為博城侯魯元公主薨賜謚為魯元太后子偃為魯王

魯王父宣平侯張敖也封齊悼惠王子章為朱虛侯以

呂祿女妻之齊丞相壽為平定侯

徐廣曰姓齊

少府延為梧

侯

徐廣曰姓陽成也延以軍匠起作宮築城也

乃封呂種為沛侯

徐廣曰釋之之子也

呂平為扶柳侯

徐廣曰呂后姊子也母字長姁

張買為南宮侯

徐廣曰其父越

人為高祖騎將

太后欲王呂氏先立孝惠後宮子強為淮陽王

韋昭曰今陳留郡

子不疑為常山王子山為襄成侯子朝為軹

侯子武為壺關侯太后封大臣大臣請立酈侯呂台為

呂王太后許之建成康侯釋之卒嗣子有罪廢立其弟

呂祿

徐廣曰釋之少子

為胡陵侯續康侯後二年常山王薨以

其弟襄成侯山為常山王更名義十一月呂王台薨謚

為肅王太子嘉代立為王三年無事

漢書云秋星晝見

四年封

呂頌為臨光侯呂他為俞侯呂更始為贅其侯

徐廣曰表云呂

后弟子淮陽丞相
呂勝為贊其侯

呂忿為呂成侯及諸侯丞相五人

徐廣

曰中邑侯朱通山都侯王恬開松
茲侯徐厲滕侯呂更始醴陵侯趙

宣平侯女為孝惠皇后

時無子詳為有身取美人子名之殺其母立所名子為

太子孝惠崩太子立為帝帝壯或聞其母死非真皇后

子廼出言曰后安能殺吾母而名我我未壯壯即為變

太后聞而患之恐其為患廼幽之永巷中言帝病甚左

右莫得見太后曰凡有天下治為萬民命

徐廣曰一
無此字

者

蓋之如天容之如地上有懼心以安百姓百姓欣然以

事其上懼欣交通而天下治今皇帝病久不已廼失惑
悞亂不能繼嗣奉宗廟祭祀不可屬天下其代之羣臣
皆頓首言皇太后為天下齊民計所以安宗廟社稷甚
深羣臣頓首奉詔帝廢位太后幽殺之五月丙辰立常
山王義為帝更名曰宏不稱元年者以太后制天下事也
以軹侯朝為常山王置太尉官絳侯勃為太尉五年八
月淮陽王薨以弟壺關侯武為淮陽王六年十月太后
曰呂王嘉居處驕恣廢之以肅王台弟呂產為呂王夏

赦天下封齊悼惠王子興居為東牟侯七年正月太后
召趙王友友以諸呂女為后弗愛愛他姬諸呂女妬怒
去讒之於太后誣以罪過曰呂氏安得王太后百歲後
吾必擊之太后怒以故召趙王趙王至置邸不見令衛
圍守之弗與食其羣臣或竊饋輒捕論之趙王餓乃歌
曰諸呂用事兮劉氏危迫脅王侯兮彊授我妃我妃既
妬兮誣我以惡讒女亂國兮上曾不寤我無忠臣兮何
故棄國自決中野兮蒼天舉直

徐廣曰舉一作與

于嗟不可悔

今寧早自財為王而餓死兮誰者憐之呂氏絕理兮託
天報讎丁丑趙王幽死以民禮葬之長安民冢次己丑
日食晝晦太后惡之心不樂乃謂左右曰此為我也二
月徙梁王恢為趙王呂王產徙為梁王梁王不之國為
帝太傅立皇子平昌侯太為呂王更名梁曰呂呂曰濟
川太后女弟呂類有女為營陵侯劉澤妻澤為大將軍
太后王諸呂恐即崩後劉將軍為害廼以劉澤為琅邪
王以慰其心梁王恢之徙王趙心懷不樂太后以呂產

女為趙王后王后從官皆諸呂擅權微伺趙王趙王不得自恣王有所愛姬王后使人酖殺之王乃為歌詩四章令樂人歌之王悲六月即自殺太后聞之以為王用婦人棄宗廟禮廢其嗣宣平侯張敖卒以子偃為魯王敖賜諡為魯元王秋太后使使告代王欲徙王趙代王謝願守代邊太傅產丞相平等言武信侯呂祿徐廣曰呂后兄子也前封胡陵侯蓋號曰武信上侯位次第一如淳曰功大者位在上功臣侯表有第一第二也之次請立為趙王太后許之追尊祿父康侯為趙昭王

九月燕靈王建薨有美人子太后使人殺之無後國除

八年十月立呂肅王子東平侯呂通為燕王封通弟呂

莊為東平侯三月中呂后被還過軹道見物如蒼犬據

徐廣曰音戰高后掖忽弗復見卜之云趙王如意為祟高后

遂病掖傷高后為外孫魯元王偃年少蚤失父母孤弱

廼封張敖前姬兩子侈為新都侯壽為樂昌侯

徐廣曰今細陽

之池陽鄉以輔魯元王偃及封中大謁者張釋為建陵侯

徐廣

曰一云張釋卿駟案如淳曰百官表謁者掌賓贊受事謹嬰為中謁者後帝以奄人為之諸官加中者多奄人

也呂榮為祝茲侯

徐廣曰呂后昆弟子

諸中宦者令丞皆為關內侯

食邑五百戶

如淳曰列侯出關就國關內侯但爵其身有加異者與關內之邑食其租稅也風俗

通義曰秦時六國未平將帥皆家關中故稱關內侯

七月中高后病甚廼令趙王

呂祿為上將軍軍北軍呂王產居南軍呂太后誡產祿

曰高帝已定天下與大臣約曰非劉氏王者天下共擊

之今呂氏王大臣弗平我即崩帝年少大臣恐為變必

據兵衛宮慎毋送喪毋為人所制辛巳高后崩遺詔賜

諸侯王各千金

蔡邕曰皇子封為王者其實古諸侯也加號稱王故謂之諸侯王王子封為侯

者謂之諸侯

將相列侯郎吏皆以秩賜金大赦天下以呂王

產為相國以呂祿女為帝后高后已葬

皇甫謐曰合葬長陵皇覽曰高

帝呂后山各一所也

以左丞相審食其為帝太傅朱虛侯劉章有

氣力東牟侯興居其弟也皆齊哀王弟居長安當是時

諸呂用事擅權欲為亂哀高帝故大臣絳灌等未敢發

朱虛侯婦呂祿女陰知其謀恐見誅廼陰令人告其

兄齊王欲令發兵西誅諸呂而立朱虛侯欲從中與大

臣為應齊王欲發兵其相弗聽八月丙午齊王欲使人

誅相相召平迺反舉兵欲圍王王因殺其相遂發兵東
詐奪琅邪王兵并將之而西語在齊王語中齊王迺遺
諸侯王書曰高帝平定天下王諸子弟悼惠王王齊悼
惠王薨孝惠帝使留侯良立臣為齊王孝惠崩高后用
事春秋高聽諸呂擅廢帝更立又比殺三趙王滅梁趙
燕以王諸呂分齊為四忠臣進諫上惑亂弗聽今高后
崩而帝春秋富未能治天下固恃大臣諸侯而諸呂又
擅自尊官聚兵嚴威劫列侯忠臣矯制以令天下宗廟

所以危寡人率兵入誅不當為王者漢聞之相國呂產等廼遣潁陰侯灌嬰將兵擊之灌嬰至滎陽乃謀曰諸呂權兵關中欲危劉氏而自立今我破齊還報此益呂氏之資也廼留屯滎陽使使諭齊王及諸侯與連和以待呂氏變共誅之齊王聞之廼還兵西界待約呂祿呂產欲發亂關中內憚絳侯朱虛等外畏齊楚兵又恐灌嬰畔之欲待灌嬰兵與齊合而發猶豫未決當是時濟川王太淮陽王武常山王朝名為少帝弟及魯元王呂后

外孫皆年少未之國居長安趙王祿梁王產各將兵居
南北軍皆呂氏之人列侯羣臣莫自堅其命太尉絳侯
勃不得入軍中主兵曲周侯酈商老病其子寄與呂祿
善絳侯廼與丞相陳平謀使入劫酈商令其子寄往紹
說呂祿曰高帝與呂后共定天下劉氏所立九王呂氏
立三王皆大臣之議事已布告諸侯諸侯皆以為宜今
太后崩帝少而足下佩趙王印不急之國守藩廼為上
將將兵留此為大臣諸侯所疑足下何不歸將印以兵

屬太尉請梁王歸相國印與大臣盟而之國齊兵必罷
大臣得安足下高枕而王千里此萬世之利也呂祿信
然其計欲歸將印以兵屬太尉使人報呂產及諸呂老
人或以為便或曰不便計猶豫未有所決呂祿信酈寄
時與出游獵過其姑呂嬃嬃大怒曰若為將而棄軍呂
氏今無處矣迺悉出珠玉寶器散堂下曰毋為他人守
也左丞相食其免八月庚申旦平陽侯窋行御史大夫
事見相國產計事郎中令賈壽使從齊來因數產曰王

不蚤之國今雖欲行尚可得邪具以灌嬰與齊楚合從
欲誅諸呂告產迺趣產急入宮平陽侯頗聞其語迺馳
告丞相太尉太尉欲入北軍不得入襄平侯通尚符節

徐廣曰姓紀張晏曰紀信
子也尚主也今符節令

迺令持節矯內太尉北軍太

尉復令酈寄與典客劉揭

酈案漢書百官表曰典客
秦官也掌諸侯歸義蠻夷先

說呂祿曰帝使太尉守北軍欲足下之國急歸將印辭

去不然禍且起呂祿以為酈兄

徐廣曰音況
字也名寄

不欺已遂

解印屬典客而以兵授太尉大尉將之入軍門行令軍

中曰為呂氏右禮為劉氏左禮軍中皆左禮為劉氏太尉行至將軍呂祿亦已解上將印去太尉遂將北軍然尚有南軍平陽侯聞之以呂產謀告丞相平丞相平乃召朱虛侯佐太尉太尉令朱虛侯監軍門令平陽侯告衛尉毋入相國產殿門呂產不知呂祿已去北軍迺入未央宮欲為亂殿門弗得入徘徊往來平陽侯恐弗勝馳語太尉太尉尚恐不勝諸呂未敢訟言誅之

徐廣曰訟一作

公駟案韋昭曰訟猶公也

迺遣朱虛侯謂曰急入宮衛帝朱虛侯請

卒太尉子卒千餘人入未央宮門遂見產廷中日晡時
遂擊產產走天風大起以故其從官亂莫敢鬪逐產殺
之郎中府吏廁中

如淳曰百官表郎中令掌宮殿門戶
故其府在宮中後轉為光祿勳也

朱虛侯已殺產帝命謁者持節勞朱虛侯朱虛侯欲奪
節信謁者不肯朱虛侯則從與載因節信馳走斬長樂
衛尉呂更始還馳入北軍報太尉太尉起拜賀朱虛侯
曰所患獨呂產今已誅天下定矣遂遣人分部悉捕諸
呂男女無少長皆斬之辛酉捕斬呂祿而宮殺呂頹使

人誅燕王呂通而廢魯王偃壬戌以帝太傅食其復為
左丞相戊辰徙濟川王王梁立趙幽王子遂為趙王遣
朱虛侯章以誅諸呂氏事告齊王令罷兵灌嬰兵亦罷
滎陽而歸諸大臣相與陰謀曰少帝及梁淮陽常山王
皆非真孝惠子也呂后以計詐名他人子殺其母養後
宮令孝惠子之立以為後及諸王以彊呂氏今皆已夷
滅諸呂而所置立即長用事吾屬無類矣不如視諸王
最賢者立之或言齊悼惠王高帝長子今其適子為齊

王推本言之高帝適長孫可立也大臣皆曰呂氏以外
家惡而幾危宗廟亂功臣今齊王母家駟鈞駟鈞惡人
也即立齊王則復為呂氏欲立淮南王以為少母家又
惡迺曰代王方今高帝見子最長仁孝寬厚太后家薄
氏謹良且立長故順以仁孝聞於天下便迺相與共陰
使人召代王代王使人辭謝再反然後乘六乘傳張晏曰備
漢制有變欲馳還後九月文穎曰即閏九月也時律歷
也或曰傳車六乘晦日巳酉至長安舍代邸人臣
十月為歲首至九月則
歲終後九月朔月

皆往謁奉天子璽上代王共尊立為天子代王數讓羣

臣固請然後聽東牟侯興居曰誅呂氏吾無功請得除

宮廼與大僕汝陰侯滕公入宮前謂少帝曰足下非劉

氏不當立乃顧麾左右執戟者拊兵罷去

徐廣曰拊音仆

有數

人不肯去兵宦者令張澤諭告亦去兵滕公廼召乘輿

車載少帝出

蔡邕曰敢盜乘輿服御物天子至尊不敢濫瀆言之故託於乘輿也乘猶載也與猶

車也天子以天下為家不以京師宮室為常處則常乘車與以行天下故羣臣託乘輿以言之也故或謂之車

駕少帝曰欲將我安之乎滕公曰出就舍舍少府廼奉

天子法駕

蔡邕曰天子有大駕小駕法駕上乘金根車駕六馬有五時副車駕四馬侍中參乘屬車

三十
六乘

迎代王於邸報曰宮謹除代王即夕入未央宮有

謁者十人持戟衛端門曰天子在也足下何為者而入
代王廼謂太尉太尉往諭謁者十人皆拊兵而去代王
遂入而聽政夜有司分部誅滅梁淮陽常山王及少帝
於邸代王立為天子二十三年崩謚為孝文皇帝

太史公曰孝惠皇帝高后之時黎民得離戰國之苦君
臣俱欲休息乎無為故惠帝垂拱高后女主稱制政不

出房戶天下晏然刑罰罕用罪人是希民務稼穡衣食
滋殖

史記集解卷九

欽定四庫全書

史記集解卷十

宋 裴駰 撰

史記十

孝文本紀第十

孝文皇帝

漢書音義
曰諱恆

高祖中子也高祖十一年春已破

陳豨軍定代地立為代王都中都太后薄氏子即位十

七年高后八年七月高后崩九月諸呂呂產等欲為亂

以危劉氏大臣共誅之謀召立代王事在呂后語中丞相陳平太尉周勃等使人迎代王代王問左右郎中令張武等張武等議曰漢大臣皆故高帝時大將習兵多謀詐此其屬意非止此也特畏高帝呂太后威耳今已

誅諸呂新哂血京師

公羊傳曰京大師衆也天子之居必以衆大之辭言也

此以

迎大王為名實不可信願大王稱疾毋往以觀其變中尉宋昌進曰羣臣之議皆非也夫秦失其政諸侯豪傑竝起人人自以為得之者以萬數然卒踐天子之位者

劉氏也天下絕望一矣高帝封王子弟地犬牙相制此所謂盤石之宗也天下服其彊二矣漢興除秦苛政約法令施德惠人人自安難搖動三矣夫以呂太后之嚴立諸呂為三王擅權專制然而太尉以一節入北軍一呼士皆左袒為劉氏叛諸呂卒以滅之此乃天授非人力也今大臣雖欲為變百姓弗為使其黨寧能專一邪方今內有朱虛東牟之親外畏吳楚淮南琅邪齊代之彊方今高帝子獨淮南王與大王大王又長賢聖仁孝

聞於天下故大臣因天下之心而欲迎立大王大王勿疑也代王報太后計之猶與未定卜之龜卦兆得大橫

應劭曰以荆灼龜文正橫占曰大橫庚庚余為天王夏啓以光

服虔曰庚

橫貌也李奇曰庚其繇文也張晏曰橫行無思不服庚更也言去諸侯而即帝位也先是五帝官天下老則禪

王啓始傳父爵乃能光治先君之基業文帝亦襲父迹言似夏啓者也代王曰寡人固已

為王矣又何王卜人曰所謂天王者乃天子於是代王乃遣太后弟薄昭往見絳侯絳侯等具為昭言所以迎立意薄昭還報曰信矣毋可疑者代王乃笑謂宋昌曰

果如公言乃命宋昌參乘張武等六人乘傳詣長安至

高陵休止而使宋昌先馳之長安觀變昌至渭橋

蘇林曰在

長安北三里

丞相以下皆迎宋昌還報代王馳至渭橋羣臣

拜謁稱臣代王下車拜太尉勃進曰願請問言宋昌曰

所言公公言之所言私王者不受私太尉乃跪上天子

璽符代王謝曰至代邸而議之遂馳入代邸羣臣從至

丞相陳平太尉周勃大將軍陳武御史大夫張蒼宗正

劉郢

漢書百官表曰宗正秦官應劭曰周成王時彤伯入為宗正

朱虛侯劉章東牟

侯劉興居典客劉揭皆再拜言曰子宏等皆非孝惠帝

子不當奉宗廟臣謹請與陰安侯

蘇林曰高帝兄伯妻羹頤侯終母丘嫂也

列侯項王后

徐廣曰代項王劉仲之妻駙案蘇林曰仲子淳為吳王故追謚為項王也如淳曰項

王后封陰安侯時呂類為林光侯蕭何夫人亦為

與琅

邪王宗室大臣列侯吏二千石議曰大王高帝長子宜

為高帝嗣願大王即天子位代王曰奉高帝宗廟重事

也寡人不佞不足以稱宗廟願請楚王計宜者

蘇林曰楚王名

交高帝弟寡人不敢當羣臣皆伏固請代王西鄉讓者三南

鄉讓者再

如淳曰讓羣臣也或曰賓主位東西而君臣位南北面故西鄉坐三讓不受羣臣猶稱宜

乃更迴坐示變即君位之漸也

丞相平等皆曰臣伏計之大王奉高帝

宗廟最宜稱雖天下諸侯萬民以為宜臣等為宗廟社

稷計不敢忽願大王幸聽臣等臣謹奉天子璽符再拜

上代王曰宗室將相王列侯以為莫宜寡人寡人不敢辭

遂即天子位羣臣以禮次侍乃使太僕嬰與東牟侯興

居清宮

應劭曰舊典天子行幸所至必遺靜宮令先案行清靜殿中以虞非常

奉天子法

駕迎於代邸皇帝即日夕入未央宮乃夜拜宋昌為衛

將軍鎮撫南北軍以張武為郎中令行殿中還坐殿前
於是夜下詔書曰間者諸呂用事擅權謀為大逆欲以
危劉氏宗廟賴將相列侯宗室大臣誅之皆伏其辜朕

初即位其赦天下賜民爵一級女子百戶牛酒

蘇林曰男賜爵

女子賜牛酒

酺五日

文穎曰漢律三人已上無故羣飲罰金四兩今詔橫賜得令聚會飲食五日

孝文皇帝元年十月庚戌徙立故琅邪王澤為燕王辛
亥皇帝即阼謁高廟右丞相平徙為左丞相太尉勃為
右丞相大將軍灌嬰為太尉諸呂所奪齊楚故地皆復

與之壬子遣車騎將軍薄昭迎皇太后於代皇帝曰呂產
自置為相國呂祿為上將軍擅矯遣灌將軍嬰將兵擊
齊欲代劉氏嬰留滎陽弗擊與諸侯合謀以誅呂氏呂
產欲為不善丞相陳平與太尉周勃謀奪呂產等軍朱
虛侯劉章首先捕呂產等太尉身率襄平侯通持節承
詔入北軍典客劉揭身奪趙王呂祿印益封太尉勃萬
戶賜金五千斤丞相陳平灌將軍嬰邑各三千戶金二
千斤朱虛侯劉章襄平侯通東牟侯劉興居邑各二千

戶金千斤

徐廣曰十一月辛丑

封典客揭為陽信侯賜金千斤

十二月上曰法者治之正也所以禁暴而率善人也今犯法已論而使毋罪之父母妻子同產坐之及為收帑朕甚不取其議之有司皆曰民不能自治故為法以禁之相坐坐收所以累其心使重犯法所從來遠矣如故便上曰朕聞法正則民慤罪當則民從且夫牧民而導之善者吏也其既不能導又以不正之法罪之是反害於民為暴者也何以禁之朕未見其便其熟計之有司

皆曰陛下加大惠德甚盛非臣等所及也請奉詔書除

收孥諸相坐律令

應劭曰帑子也秦法一人有罪并坐其家室今除此律

正月有

司言曰蚤建太子所以尊宗廟請立太子上曰朕既不

德上帝神明未歆享天下人民未有噍志今縱不能博

求天下賢聖有德之人而禪天下焉而曰豫建太子是

重吾不德也謂天下何其安之有司曰豫建太子所以

重宗廟社稷不忘天下也上曰楚王季父也春秋高閔

天下之義理多矣

如淳曰閔猶言多所更歷也

明於國家之大體吳

王於朕兄也惠仁以好德淮南王弟也秉德以陪朕

文穎

曰陪輔也

豈為不豫哉諸侯王宗室昆弟有功臣多賢及有

德義者若舉有德以陪朕之不能終是社稷之靈天下之福也今不選舉焉而曰必子人其以朕為忘賢有德者而專於子非所以憂天下也朕甚不取也有司皆固請曰古者殷周有國治安皆千餘歲古之有天下者莫不長焉用此道也立嗣必子所從來遠矣高帝親率士大夫始平天下建諸侯為帝者太祖諸侯王及列侯始

受國者皆亦為其國祖子孫繼嗣世世弗絕天下之大義也故高帝設之以撫海內今釋宜建而更選於諸侯及宗室非高帝之志也更議不宜子其最長純厚慈仁請建以為太子上乃許之因賜天下民當代父後者爵各一級

韋昭曰文帝以立子為後不欲獨饗其福故賜天下為父後者爵

封將軍薄昭

為軹侯

徐廣曰正月乙巳也

三月有司請立皇后薄太后曰諸侯

皆同姓立太子母為皇后皇后姓竇氏上為立后故賜天下鰥寡孤獨窮困及年八十已上孤兒九歲已下布

帛米肉各有數上從代來初即位施德惠天下填撫諸侯四夷皆洽驩乃循從代來功臣上曰方大臣之誅諸呂迎朕朕狐疑皆止朕唯中尉宋昌勸朕朕以得保奉

宗廟已尊昌為衛將軍其封昌為壯武侯

徐廣曰四月辛亥封封三

十四年景帝中四年奪侯國除

諸從朕六人官皆至九卿上曰列侯從

高帝入蜀漢中者六十八人皆益封各三百戶故吏二

千石以上從高帝潁川守尊等十人食邑六百戶淮陽

守申徒嘉等十人五百戶衛尉定等十人四百戶封淮

南王舅父趙蕙為周陽侯齊王舅父駟鈞為清郭侯

如

曰邑名六國時齊有清郭君清音靜

秋封故常山丞相蔡蕙為樊侯人或

說右丞相曰君本誅諸呂迎代王今又矜其功受上賞

處尊位禍且及身右丞相勃乃謝病免罷左丞相平專

為丞相

徐廣曰八月

二年十月丞相平卒復以絳侯勃為丞

相上曰朕聞古者諸侯建國千餘歲各守其地以時入

貢民不勞苦上下驩欣靡有遺德今列侯多居長安邑

遠吏卒給輸費苦而列侯亦無由教訓其民其令列侯

之國為吏及詔所止者遣太子

張晏曰為吏謂以卿大夫為庶官者詔所止特

以恩愛見留者

十一月晦日有食之十二月望日又食

徐廣曰此云望

日又食梁漢書及五行志無此日食大也一本作月食然史書不紀月食

上曰朕聞之天生

蒸民為之置君以養治之人主不德布政不均則天示

之以菑以誠不治乃十一月晦日有食之適見於天菑

孰大焉朕獲保宗廟以微眇之身託於兆民君王之上

天下治亂在朕一人唯二三執政猶吾股肱也朕下不

能理育羣生上以累三光之明其不德大矣令至其悉

思朕之過失及知見思之所不及白以告朕及舉賢良方正能直言極諫者以匡朕之不逮因各飭其任職務省繇費以便民朕既不能遠德故憫然念外人之有非

漢書音義曰憫然猶介然也非奸非也

是以設備未息今縱不能罷邊屯

戍而又飭兵厚衛其罷衛將軍軍太僕見馬遺財足餘

皆以給置傳正月上曰農天下之本其開籍田

應劭曰古者天

子耕籍田千畝為天下先籍者帝王典籍之常章昭曰籍借也借民力以治之以奉宗廟且以勸率天下使務農也瓚曰景帝詔曰朕親耕后親桑為天下先本以躬親為義不得以假借為稱也籍蹈籍也朕親率

耕以給宗廟粢盛

應劭曰黍稷曰粢在器中曰盛

三月有司請立皇子

為諸侯王上曰趙幽王幽死朕甚憐之已立其長子遂

為趙王遂弟辟彊及齊悼惠王子朱虛侯章東牟侯興

居有功可王乃立趙幽王少子辟彊為河間王以齊劇

郡立朱虛侯為城陽王立東牟侯為濟北王皇子武為

代王子參為太原王子揖為梁王上曰古之治天下朝

有進善之旌

應劭曰旌旆也堯設之五達之道令民進善也如淳曰欲有進善者立於旌下言之

誹謗之木

服虔曰堯作之橋梁交午柱頭應劭曰橋梁邊板所以畜政治之愆失也至秦去之今乃

復施也 所以通治道而來諫者今法有誹謗妖言之罪是

使衆臣不敢盡情而上無由聞過失也將何以來遠方

之賢良其除之或祝詛上以相約結而後相謾

漢書音義曰民

相結共祝詛上也謾者而後謾而止之不畢祝詛也更以為大逆其有他言而吏

又以為誹謗此細民之愚無知抵死朕甚不取自今以來有犯此者勿聽治九月初與郡國守相為銅虎符竹

使符

應劭曰銅虎符第一至第五國家常發兵遣使者至郡合符符合乃聽受之竹使符皆以竹箭五枚

長五寸鐫刻篆書第一至第五張晏曰符以代古之珪璋從簡易也三年十月丁酉晦日

有食之十一月上曰前日計遣列侯之國或辭未行丞相朕之所重其為朕率列侯之國絳侯勃免丞相就國以太尉願陰侯嬰為丞相罷太尉官屬丞相四月城陽王章薨淮南王長與從者魏敬殺辟陽侯審食其五月匈奴入北地居河南為寇帝初幸甘泉

蔡邕曰天子車駕所至民臣以

為僥倖故曰幸至見令長三老官屬親臨軒樂賜食帛越巾刀佩帶民爵有級數或賜田租之半故因是謂之

幸

六月帝曰漢與匈奴約為昆弟毋使害邊境所以輸遺匈奴甚厚今右賢王離其國將眾居河南降地非常

故往來近塞捕殺吏卒驅保塞蠻夷令不得居其故陵
轢邊吏入盜甚赦無道非約也其發邊吏騎八萬五千

詣高奴遣丞相潁陰侯灌嬰擊匈奴匈奴去發中尉

漢書

百官表曰
中尉秦官

材官屬衛將軍軍長安辛卯帝自甘泉之高

奴因幸太原見故羣臣皆賜之舉功行賞諸民里賜牛

酒復晉陽中都民三歲留游太原十餘日濟北王興居

聞帝之代欲往擊胡乃反發兵欲襲滎陽於是詔罷丞

相兵遣棘蒲侯陳武為大將軍將十萬往擊之祁侯賀

徐廣曰姓繒以文帝十一年卒謚曰敬

為將軍軍滎陽七月辛亥帝自太

原至長安廼詔有司曰濟北王背德反上誅誤吏民為

大逆濟北吏民兵未至先自定及以軍地邑降者皆赦

之復官爵與王興居去來亦赦之

徐廣曰乍去乍來也
駟案張晏曰雖殆與

興居反今降赦之

八月破濟北軍虜其王赦濟北諸吏民與王

反者 六年有司言淮南長廢先帝法不聽天子詔居

處毋度出入擬於天子擅為法令與棘蒲侯太子奇謀

反遣人使閩越及匈奴發其兵欲以危宗廟社稷羣臣

議皆曰長當棄市帝不忍致法於王赦其罪廢勿王羣

臣請處王蜀嚴道邛都

徐廣曰漢書本或作却字或直云邛雙邛都乃本是西南夷爾

時未通嚴道有邛雙山

帝許之長未到處所行病死上憐之後十

六年追尊淮南王長謚為厲王立其子三人為淮南王

衡山王廬江王十三年夏上曰蓋聞天道禍自怨起

而福繇惠興百官之非宜由朕躬今祕祝之官移過於

下

應劭曰祕祝之官移過於下國家諱之故曰祕

以彰吾之不德朕甚不取其

除之五月齊太倉令淳于公有罪當刑詔獄逮徙繫長

安太倉公無男有女五人太倉公將行會逮罵其女曰
生子不生男有緩急非有益也其少女緹縈自傷泣乃
隨其父至長安上書曰妾父為吏齊中皆稱其廉平今
坐法當刑妾傷夫死者不可復生刑者不可復屬雖復
欲改過自新其道無由也妾願沒入為官婢贖父刑罪
使得自新書奏天子天子憐悲其意乃下詔曰蓋聞有
虞氏之時畫衣冠異章服以為僂而民不犯何則至治
也今法有肉刑三

李奇曰約法三章無肉刑文帝則有
肉刑孟康曰黥劓二左右趾合一

三凡而姦不止其咎安在非乃朕德薄而教不明歟吾甚

自愧故夫馴道不純而愚民陷焉詩曰愷悌君子民之
父母今人有過教未施而刑加焉或欲改行為善而道
毋由也朕甚憐之夫刑至斷支體刻肌膚終身不息何
其楚痛而不德也豈稱為民父母之意哉其除肉刑上
曰農者天下之本務莫大焉今勤身從事而有租稅之
賦是為本末者無以異

李奇曰本農也末賈也言農與
賈俱出租無異也故除田租

其於勸農之道未備其除田之租稅十四年冬匈奴

謀入邊為寇攻朝那塞殺北地都尉邛

徐廣曰姓孫封其子單為緡侯

匈奴所殺

上乃遣三將軍軍隴西北地上郡中尉周舍為衛

將軍郎中令張武為車騎將軍軍渭北車千乘騎卒十

萬帝親自勞軍勒兵申教令賜軍吏卒帝欲自將擊匈

奴羣臣諫皆不聽皇太后固要帝

如淳曰必不得自征也

帝乃止

於是以前陽侯張相如為大將軍成侯赤

徐廣曰姓董也

為內

史樂布為將軍擊匈奴匈奴遁走春上曰朕獲執犧牲

珪幣以事上帝宗廟十四年於今歷日縣長以不敏不

明而久撫臨天下朕甚自愧其廣增諸祀壇場珪幣昔

先王遠施不求其報望祀不祈其福右賢左戚

韋昭曰右猶高

左猶下也

先民後已至明之極也今吾聞祀官祝釐

如淳曰釐福也

賈誼傳受釐坐宣室

皆歸福朕躬不為百姓朕甚愧之夫以朕不

德而躬享獨美其福百姓不與焉是重吾不德其令祠

官致敬毋有所祈是時北平侯張蒼為丞相方明律歷魯

人公孫臣上書陳終始傳五德事言方今土德時土德

應黃龍見當改正朔服色制度天子下其事與丞相議

丞相推以為今水德始明正十月上黑事以為其言非

是請罷之

十五年黃龍見成紀

韋昭曰成紀縣屬天水

天子乃

復召魯公孫臣以為博士申明土德事於是上乃下詔

曰有異物之神見於成紀無害於民歲以有年朕親郊

祀上帝諸神禮官議毋諱以勞朕

漢書音義曰言無所諱勿以朕為勞有

司禮官皆曰古者天子夏躬親禮祀上帝於郊故曰郊

於是天子始幸雍郊見五帝以孟夏四月答禮焉趙人

新垣平以望氣見因說上設立渭陽五廟

韋昭曰在渭城欲出

周鼎當有玉英見

瑞應圖云玉英五帝並修則見

十六年上親郊見渭

陽五帝廟亦以夏答禮而尚赤

十七年得玉卮

應劭曰新垣

平許令人獻之

刻曰人主延壽於是天子始更為元年令天下

大酺其歲新垣平事覺夷三族後二年上曰朕既不明

不能遠德是以使方外之國或不寧息夫四荒之外不

安其生封畿之內勤勞不處二者之咎皆自於朕之德

薄而不能遠達也間者累年匈奴並暴邊境多殺吏民

邊臣兵吏又不能諭吾內志以重吾不德也夫久結難

連兵中外之國將何以自寧今朕夙興夜寐勤勞天下

憂苦萬民為之怛惕不安未嘗一日忘於心故遣使者

冠蓋相望結軼於道

韋昭曰使車往還故轍如結也相如曰結軌還轍

以諭朕

意於單于今單于反古之道計社稷之安便萬民之利

親與朕俱棄細過偕之大道結兄弟之義以全天下元

元之民和親已定始於今年後六年冬匈奴三萬人入

上郡三萬人入雲中以中大夫令勉

徐廣曰衛尉改名也駟案漢書百官

表景帝初改衛尉為中大夫令非此年也

為車騎將軍軍飛狐

如淳曰在代郡蘇林曰在

上黨故楚相蘇意為將軍軍句注應劭曰山陰名將軍張

武屯北地河內守周亞夫為將軍居細柳徐廣曰在長安西駟案如

淳曰長安圖細柳倉在渭北近右衛張揖曰在昆明池南今有柳市是也宗正劉禮為將軍

居霸上祝茲侯徐廣曰表作松茲侯姓徐名悍軍棘門徐廣曰在渭北駟案孟康曰在

長安北秦時宮門也如淳曰三輔黃圖棘門在橫門外以備胡數月胡人去亦罷

天下旱蝗帝加惠令諸侯毋入貢弛山澤章昭曰弛廢廢其常禁以

利減諸服御狗馬損郎吏員發倉庾應劭曰水漕倉曰庾胡公曰在邑曰

倉在野以振貧民民得賣爵孝文帝從代來即位二十

三年宮室苑囿狗馬服御無所增益有不便輒弛以利

民嘗欲作露臺

徐廣曰露一作靈

召匠計之直百金上曰百金

中民十家之產吾奉先帝宮室常恐羞之何以臺為上

常衣綈衣

如淳曰賈誼云身衣卑綈

所幸慎夫人令衣不得曳地幃

帳不得文繡以示敦朴為天下先治霸陵皆以瓦器不

得以金銀銅錫為飾不治墳欲為省毋煩民南越王尉

佗自立為武帝然上召貴尉佗兄弟以德報之佗遂去

帝稱臣與匈奴和親匈奴背約入盜然令邊備守不發

兵深入惡煩苦百姓吳王詐病不朝就賜几杖羣臣如

袁盎等稱說雖切常假借用之

蘇林曰假音休假借者以物借人

羣臣

如張武等受賂遺金錢覺上乃發御府金錢賜之以愧

其心弗下吏專務以德化民是以海內殷富興於禮義

後七年六月己亥帝崩於未央宮

徐廣曰年四十七

遺詔曰朕

聞蓋天下萬物之萌生靡不有死死者天地之理物之

自然者奚可甚哀當今之時世咸嘉生而惡死厚葬以

破業重服以傷生吾甚不取且朕既不德無以佐百姓

今崩又使重服久臨以離寒暑之數哀人之父子傷長幼之志損其飲食絕鬼神之祭祀以重吾不德也謂天下何朕獲保宗廟以眇眇之身託於天下君王之上二十有餘年矣賴天地之靈社稷之福方內安寧

璣曰方內方也

內中也猶云中也

靡有兵革

徐廣曰一云方內安兵革息

朕既不敏常畏過

行以羞先帝之遺德維年之久長懼於不終今乃幸以

天年得復供養於高廟朕之不明與嘉之

如淳曰與發聲也得卒天

年已善矣

其奚哀悲之有其令天下吏民令出臨三日皆釋

服母禁取婦嫁女祠祀飲酒食肉者自當給喪事服臨

者皆無踐

服虔曰踐翦也謂無斬裏也孟康曰踐跣也晉灼曰漢語作跣跣徒跣也

經帶無

過三寸母布車及兵器

應劭曰無以布衣車及兵器也不施輕車介士也

毋發

人男女哭臨宮殿宮殿中當臨者皆以旦夕各十五舉

聲禮畢罷非旦夕臨時禁毋得擅哭已下服大紅十五

日小紅十四日纖七日釋服

服虔曰當言大功小功布也纖細布衣也應劭曰紅

者中祥大祥以紅為領緣也者禫也凡三十六日而釋服

佗不在令中者皆以此

令比率從事布告天下使明知朕意霸陵山川因其故

應劭曰因山為藏不復起墳山下川流不過絕也就其水名以為陵號

毋有所改歸夫人

以下至少使

應劭曰夫人以下有美人良人八子七子長使少使凡七輩皆遣歸家重絕人類者

也令中尉亞夫為車騎將軍屬國悍

徐廣曰姓徐駟案漢書百官表典屬

國秦官掌蠻夷降者為將屯將軍

李奇曰馮奉世為右將軍以將屯將軍為名此監主諸屯也

郎中令武為復土將軍

如淳曰主穿壙填瘞事者

發近縣見卒萬六

千人發內史卒萬五千人藏郭穿復土屬將軍武乙巳

漢書云乙巳葬皇甫謐曰霸陵去長安七十里

羣臣皆頓首上尊號曰孝文皇

帝太子即位於高廟丁未襲號曰皇帝

孝景皇帝元年十月制詔御史蓋聞古者祖有功而宗

有德

應劭曰始取天下者為祖高帝稱高祖是也始治天下者為宗文帝稱太宗是也

制禮樂

各有由聞歌者所以發德也舞者所以明功也高廟酎

張晏曰正月旦作酒八月成名曰酎酎之言純也至武帝時因八月嘗酎會諸侯廟中出金助祭所謂酎金也

奏武德文始五行之舞

孟康曰武德高祖所作也文始舞也五行周舞也武德者其

舞人執干戚文始舞執羽籥五行舞冠冕衣服法五行色見禮樂志

孝惠廟酎奏文始五

行之舞孝文皇帝臨天下通關梁不異遠方

張晏曰孝文十二年

除閹不用傳令遠近若一

除誹謗去肉刑賞賜長老收恤孤獨以育

羣生減嗜欲不受獻

徐廣曰減一作減

不私其利也罪人不孥

蘇林曰刑不及妻子

不誅無罪除肉刑出美人重絕人之世朕既

不敏不能識此皆上古之所不及而孝文皇帝親行之

德厚侔天地

李奇曰侔齊等

利澤施四海靡不獲福焉明象乎

日月而廟樂不稱朕甚懼焉其為孝文皇帝廟為昭德

之舞

文穎曰景帝采高祖武德舞作昭德舞舞之於文帝廟見禮樂志

以明休德然後

祖宗之功德著於竹帛施於萬世永永無窮朕甚嘉之

其與丞相列侯中二千石禮官具為禮儀奏丞相臣嘉

等言陛下永思孝道立昭德之舞以明孝文皇帝之盛德皆臣嘉等愚所不及臣謹議曰功莫大於高皇帝德莫盛於孝文皇帝高皇廟宜為帝者太祖之廟孝文皇帝廟宜為帝者太宗之廟天子宜世世獻祖宗之廟郡國諸侯宜各為孝文皇帝立太宗之廟諸侯王列侯使者侍祠天子歲獻祖宗之廟

張晏曰王及列侯歲時遣使詣京師侍祠助祭也如

淳曰若光武廟在章陵南陽太守稱使者往祭是也不使侯王祭者諸侯不得祖天子也凡臨祭祀宗廟皆為

侍祭請著之竹帛宣布天下制曰可

太史公曰孔子言必世而後仁

孔安國曰三十年曰世如有受命王者必三十

年仁政乃成

善人之治國百年亦可以勝殘去殺

王肅曰勝殘暴之人

使不為惡去殺不用殺也

誠哉是言漢興至孝文四十有餘載德至

盛也廩廩鄉改正服封禪矣謙讓未成於今嗚呼豈不

仁哉

史記集解卷十

欽定四庫全書

史記集解卷十一

宋 裴駰 撰

史記十一

孝景本紀第十一

孝景皇帝者

漢書音義
曰諱啓

孝文之中子也母竇太后孝文

在代時前后有三男及竇太后得幸前后死及三子更
死故孝景得立元年四月乙卯赦天下乙巳賜民爵一

級五月除田半租為孝文立太宗廟令羣臣無朝賀匈奴
入代與約和親 二年春封故相國蕭何孫係為武陵

侯

徐廣曰漢書亦作係鄒誕生本作僕音奚又案漢書功臣表及蕭何傳皆云孫嘉疑其人有二名

男

子二十而得傳四月壬午孝文太后崩廣川長沙王皆
之國丞相申屠嘉卒八月呂御史大夫開封侯陶青為
丞相彗星出東北秋衡山雨雹大者五寸深者二尺熒
惑逆行守北辰月出北辰間歲星逆行天廷中置南陵

及內史殺裒為縣

徐廣曰地理志云文帝七年置驕案地理志百官表南陵縣文帝置也分

內史為左右及殺祠為縣皆
景帝二年不得皆如徐所云

三年正月乙巳赦天下

長星出西方天火

徐廣曰
漢志無

燔雒陽東宮大殿城室

徐廣曰雒

一作淮

吳王濞楚王戊趙王遂膠西王卬濟南王辟光菑

川王賢膠東王雄渠反發兵西鄉天子為誅鼂錯遣袁
盎諭告不止遂西圍梁上乃遣大將竇嬰太尉周亞夫
將兵誅之六月乙亥赦亡軍及楚元王子敖等與謀反
者封大將軍竇嬰為魏其侯立楚元王子平陸侯劉禮
為楚王立皇子端為膠西王子勝為中山王徙濟北王

志為菑川王淮陽王餘為魯王汝南王非為江都王齊

王將盧燕王嘉皆薨

徐廣曰表云五年薨

四年夏立太子立皇

子轍為膠東王六月甲戌赦天下後九月更以弋陽為

陽陵復置津關用傳出入

應劭曰文帝十二年除關無用傳至此復置傳以七國新

反備非常也張晏曰傳信也若今過所也如淳曰傳音檄傳之傳兩行書繒帛分持其一出入關合之乃得過

謂之傳

冬以趙國為邯鄲郡

地理志趙國景帝以為邯鄲郡

五年三月

作陽陵渭橋五月募徙陽陵子錢二十萬江都大暴風

從西方來壞城十二丈丁卯封長公子矯為隆慮侯徙

廣川王為趙王 六年春封中尉趙綰為建陵侯江都

丞相嘉

徐廣曰
姓程

為建平侯隴西太守渾邪為平曲侯趙

丞相嘉

徐廣曰
姓蘇

為江陵侯故將軍布為郿侯梁楚二王

皆薨後九月伐馳道樹殖蘭池

徐廣曰殖
一作填

七年冬廢

栗太子為臨江王十二月晦日有食之春免徒隸作陽

陵者丞相青免二月乙巳以太尉條侯周亞夫為丞相

四月乙巳立膠東王太后為皇后丁巳立膠東王為太

子名徹 中元年封故御史大夫周苛孫平

徐廣曰
一作應為

繩侯故御史大夫周昌子左車為安陽侯四月乙巳赦天下賜爵一級除禁錮地動衡山原都雨雹大者尺八

寸 中二年二月匈奴入燕遂不和親三月召臨江王

來即死中尉府中夏立皇子越為廣川王子寄為膠東

王封四侯

文穎曰楚相張尚太傅趙夷吾趙相建德內史王惲此四人各諫其王無使反不聽皆殺

之故封其子

九月甲戌日食

中三年冬罷諸侯御史中丞

春匈奴王二人率其徒來降皆封為列侯立皇子方乘為清河王三月彗星出西北丞相周亞夫死以御史大

夫桃侯劉舍為丞相四月地動九月戊戌晦日食軍東

都門外

案三輔黃圖東出北第一門曰宣平門外曰東都門

中四年三月置德

陽宮

瓚曰是景帝廟也帝自作之諱不言廟故言宮西京故事云景帝廟為德陽宮

大蝗秋赦

徒作陽陵者

中五年夏立皇子舜為常山王封十侯

六月丁巳赦天下賜爵一級天下大潦更命諸侯丞相

曰相秋地動

中六年二月己卯行幸雍郊見五帝三

月雨雹四月梁孝王城陽共王汝南王皆薨立梁孝王

子明為濟川王子彭離為濟東王子定為山陽王子不

識為濟陰王梁分為五封四侯更命廷尉為大理將作

少府為將作大匠主爵中尉為都尉

漢書百官表曰主爵中尉秦官掌列

侯長信詹事

漢書百官表曰詹事秦官掌皇后太子家應劭曰詹省也給也瓚曰茂陵書詹事秩

二千石為長信少府

張晏曰以太后所居宮為名長信宮則曰長樂少

府將行為大長秋

漢書百官表曰將行秦官應劭曰長秋皇后卿

大行為行人

服虔曰天子死未有謚稱大行晉灼曰禮有大行小行主謚官故以此名之如淳曰不反之辭也瓚曰大行是

官名掌九儀之制以賓諸侯

奉常為太常

漢書百官表曰奉常秦官掌宗廟禮儀

典客

為大行治粟內史為大農

漢書百官表曰治粟內史秦官掌穀貨也

以大內

為二千石

韋昭曰大內京師府藏

置左右內官屬大內七月辛亥

日食八月匈奴入上郡

後元年冬更命中大夫為衛

尉三月丁酉赦天下賜爵一級中二千石諸侯相爵右

庶長四月大酺五月丙戌

徐廣曰丙一作甲

地動其蚤食時復

動上庸地動二十二日壞城垣七月乙巳日食丞相劉

舍免八月壬辰以御史大夫綰為丞相封為建陵侯

後二年正月地一日三動郅將軍擊匈奴酺五日令內史

郡不得食馬粟沒入縣官令徒隸衣七綬布止馬春為

歲不登禁天下食不造歲省列侯遣之國

晉灼曰文紀遣列侯之國

今又省之三月匈奴入鴈門十月租長陵田大旱衡山國河

東雲中郡民疫後三年十月日月皆食赤五日十二

月晦雷

徐廣曰一作雷字又作國字實所未詳

日如紫五星逆行守太微

月貫天庭中正月甲寅皇太子冠甲子孝景皇帝崩

皇甫

謫曰帝以孝惠七年生年四十八

遺詔賜諸侯王以下至民為父後爵

一級天下戶百錢出宮人歸其家復無所與太子即位

是為孝武皇帝

漢書云二月癸酉帝葬陽陵皇甫謐曰陽陵山方百二十步高十四丈去長安

四十三里三月封皇太后弟蚡

蘇林曰蚡音飴

為武安侯弟勝為

周陽侯置陽陵

太史公曰漢興孝文施大德天下懷安至孝景不復憂異姓而黽錯刻削諸侯遂使七國俱起合從而西鄉以諸侯大盛而錯為之不以漸也及主父偃言之而諸侯以弱卒以安安危之機豈不以謀哉

史記集解卷十一